

旧病频发，似加重矣，如何如何，噫。

十八日（7月24日） 晴热。方如旧。读亦佳，午初二退。入署，全师在彼，积水潭事司官不愿，师意究不能了然，听之可已。写对。吴翠峰等两君来见。访晤少彭，值马先生翰来，余即归，马亦余所代邀也。又得徐雨之函，再以西北地图见寄，即复之。作南信。十二号。永定河水利银解到，每堂分得二百二两，此亦非余所愿。

十九日（7月25日） 晴，不甚热。读好，午初多即退。畏热未出，写对。浙江解海塘水利银委员胡晋姓季临之长子，号春原，同知。来见，以文书来，告以到部投递。夜绍彭来，闻驻俄副使邵君有电报。到船十馀只。

二十日（7月26日） 晴热。读初好，继而起波，稍动声色，减去数号方过，已巳正矣。先退，吊治贝勒妻丧。行至翰林院黑云疾雷大雨，入檐下避之，少倾雨渐稀。冒雨出城，诣龙树寺请客，魏绍仁、寿卿、江苏知县、笛生太老师之孙。周孚先、翼廷，江苏知县，汤伯述内亲。汤学坚厚初、陆涑文、庞劬庵、邵伯寅、徐文卿，皆数日内行客也。坐小楼颇爽，饮于西厅，殊黑。入城薄暮，晴。

廿一日（7月27日） 晴热。值日，无起，报房小坐，遂入，未及起居。读尚佳而停顿，颇难著力，午初二退。少彭到余等坐处，伊进膳被赐叩头也，凡进膳每人费一百廿两，今年圈出亲王、贝勒、御前大臣、军机、内务府大臣。写对乏极。杨生崇伊、陆涑文先后来，门人范金镛今始来谒，谢入未晤。为涑文书长卷。为同邑黄孝廉宗城之父黄谱云题其遗诗册。昨日旨董恂毋庸在总理衙门行走，万青藜准其开去兼尹。仍留吏部尚书，前日事，此新祥也，记之。

廿二日（7月28日） 黎明微雨，旋止，黑云如山，来自西北，卯辰间大雨，疾雷数声，直至午初始止，晚晴。方云食后流清涕。读尚佳，午初一退。入署，路又难矣，归写大字，胡太守春原以大笔见赠，上